

摘藻堂四庫全書薈要

史部

欽定四庫全書薈要

史部
明史卷二百七十九



詳校官兵部主事臣雷純

欽定四庫全書薈要卷六千八百七十一 史部

明史卷二百七十八

大學士張廷玉等奉 敕修

傳第一百六十六

楊廷麟 彭期生等

萬元吉 楊文薦
梁于涖

郭維經 姚奇允

詹兆恒 胡夢泰
周定仍等

陳泰來 曹志明

王養正 夏萬亨等

曾亨應 弟和應

子 筠
揭重熙 傅鼎銓



陳子壯

夢而炫
霍子衡

朱實蓮

張家玉

陳象明等

陳邦彥

蘇觀生

楊廷麟字伯祥清江人崇禎四年進士改庶吉士授編
修勤學嗜古有聲館閣間與黃道周善十年冬皇太子
將出閣充講官兼直經筵廷麟具疏讓道周不許明年
二月帝御經筵問保舉考選何者為得人廷麟言保舉
當嚴舉主如唐世濟王維章乃溫體仁王應熊所薦今
二臣皆敗而舉主不問是連坐之法先不行於大臣欲

收保舉效得乎帝為動色其冬京師戒嚴廷麟上疏劾
兵部尚書楊嗣昌言陛下有撻伐之意大臣無禦侮之
才謀之不臧以國為戲嗣昌及薊遼總督吳阿衡內外
扶同朋謀誤國與高起潛方一藻倡和款議武備頓忘
以至於此今可憂在外者三在內者五督臣盧象昇以
禍國責樞臣言之痛心夫南仲在內李綱無功潛善秉
成宗澤殞命乞陛下赫然一怒明正向者主和之罪俾
將士畏法無有二心名見大小諸臣咨以方畧諭象昇

集諸路援師乘機赴敵不從中制此今日急務也時嗣

昌意主和議冀紓外患而廷麟痛詆之嗣昌大恚詭薦

廷麟知兵帝改廷麟兵部職方主事贊畫象昇軍象昇

喜即令廷麟往真定轉餉濟師無何象昇戰死賈莊嗣

昌意廷麟亦死及聞其奉使在外則為不懌者久之初

張若麒沈迅官刑曹謀改兵部御史涂必泓沮之必泓

廷麟同里也兩人疑疏出廷麟指因與嗣昌比而構廷

麟會廷麟報軍中曲折嗣昌擬旨責以欺罔事平貶廷

麟秩調之外黃道周獄起詞連廷麟當逮未至而道周已釋言者多薦廷麟十六年秋復授職方主事未赴都城失守廷麟慟哭募兵勤王福王立用御史祁彪佳薦名為左庶子辭不就宗室朱統鑽誣劾廷麟召健兒有不軌謀以姜曰廣為內應王不問而廷麟所募兵亦散順治二年南都破江西諸郡惟贛州存唐王手書加廷麟吏部右侍郎劉同升國子祭酒同升自雩都至贛與廷麟謀大舉乃偕巡撫李永茂集紳士於明倫堂勸輸

兵餉九月

大兵屯泰和副將徐必達戰敗廷麟同升乘虛復吉安
臨江加兵部尚書兼東閣大學士賜劍便宜從事十月
大兵攻吉安必達戰敗赴水死會廣東援兵至

大兵退屯峽江已而萬元吉至贛十二月同升卒三年
正月廷麟赴贛招峒蠻張安等四營降之號龍武新軍
廷麟聞王將由汀赴贛將往迎王而以元吉代守吉安
無何吉安復失元吉退保贛州四月

大兵逼城下廷麟遣使調廣西狼兵而身往雩都趣新
軍張安來救五月望安戰梅林再敗退保雩都廷麟乃
散其兵以六月入贛與元吉憑城守未幾援兵至圍暫
解已復合八月水師戰敗援師悉潰及汀州告變贛圍
已半年守陴者皆懈十月四日

大兵登城廷麟督戰久之力不支走西城投水死同守
者郭維經彭期生等皆死期生字觀我海鹽人御史宗
孟子登萬厯四十四年進士崇禎初為濟南知府坐失

囚謫布政司照磨量移應天推官轉南京兵部主事進

郎中十六年張獻忠亂江西遷湖西兵備僉事駐吉安

吉安不守走贛州偕廷麟招降張安等加太常寺卿仍

視兵備事城破冠帶自縊死一時同殉者職方主事周

瑚磔死通判王明汲編修兼兵科給事中萬發祥吏部

主事龔棻戶部主事林琦兵部主事王其宐黎遂球柳

昂霄魯嗣宗錢謙亨中書舍人袁從鶚劉孟鞫劉應試

推官署府事吳國球監紀通判郭寧登臨江推官胡鎮

贛縣知縣林逢春皆就戮鄉官盧觀象盡驅男婦大小入水乃自沈死舉人劉日佺偕母妻弟婦子姪同日死參將陳烈數力戰衆以其弟已降疑之烈益奮勇疾鬪及見執不屈顧謂贛人曰而後乃今知我無二心也遂就戮

萬元吉字吉人南昌人天啟五年進士授潮州推官補歸德捕大盜李守志散其黨崇禎四年大計謫官十一年秋用曾櫻薦命以永州檢校署推官事居二年督師

楊嗣昌薦其才改大理右評事軍前監紀嗣昌倚若左
右手諸將亦悅服馳驅兵間未嘗一夕安枕嗣昌卒元
吉丁內艱歸十六年起南京職方主事進郎中福王立
仍故官四鎮不和元吉請奉詔宣諭又請發萬金犒高
傑於揚州諭以大義令保江淮乃渡江詣諸將營傑與
黃得功劉澤清方爭揚州元吉與得功書令共獎王室
得功報書如元吉指乃錄其藁示澤清傑嫌漸解廷議
以元吉能輯諸鎮擢太僕少卿監視江北軍務元吉身

在外不忘朝廷數有條奏請修建文實錄復其尊稱并
還懿文追尊故號祀之寢園以建文配而速褒靖難死
事諸臣及近日北都四方殉難者以作忠義之氣從之
又言先帝天資英武銳意明作而禍亂益滋寬嚴之用
偶偏任議之途太畸也先帝初懲逆璫用事委任臣工
力行寬大諸臣扭之爭意見之異同畧綢繆之桑土敵
入郊圻束手無策先帝震怒宵小乘間中以用嚴於是
廷杖告密加派抽練使在朝者不暇救過在野者無復

聊生廟堂號振作而敵強如故寇禍彌張十餘年來小
人用嚴之效如是先帝亦悔更從寬大恣反前規天下
以為太平可致諸臣復競賄賂肆欺蒙每趨愈下再搜
先帝之怒誅殺方興宗社繼歿蓋諸臣之孽每乘於先
帝之寬而先帝之嚴亦每激於諸臣之玩臣所謂寬嚴
之用偶偏者此也國步艱難於今已極乃議者求勝於
理即不審勢之重輕好伸其言多不顧事之損益殿上
之彼已日爭閫外之從違遙制一人任事衆口議之如

孫傳庭守關中識者俱謂不宜輕出而已有以逗撓議之者矣賊既渡河臣語史可法姜曰廣急撤關寧吳三桂兵隨樞輔迎擊先帝召對時羣臣亦曾及此而已有以感地議之者矣及賊勢燎原廷臣或勸南幸或勸皇儲監國南都皆權宜善計而已有以邪妄議之者矣由事後而觀咸追恨議者之誤國倘事幸不敗必共服議者之守經大抵天下事無全害亦無全利當局者非樸誠通達誰敢違衆獨行旁持者競意氣筆鋒必欲強人

從我臣所謂任議之途太畸者此也乞救前事之失為
後事之師以寬為體以嚴為用蓋崇簡易推真誠之謂
寬而濫賞縱罪者非寬辨邪正綜名實之謂嚴而鈎距
索隱者非嚴寬嚴得濟任議乃合仍請於任事之人嚴
覈始進寬期後效無令行間再踵藏垢邊才久借然灰
收之以嚴然後可任之以寬也詔褒納之明年五月南
京覆走福建歸唐王六月我

大清兵已取南昌袁州臨江吉安踰月又取建昌惟贛

州孤懸上游兵力單寡會益府永寧王慈炎招降峒賊張安所號龍武新軍者也遣復撫州南贛巡撫李永茂乃命副將徐必達扼泰和拒

大兵未幾戰敗至萬安遇永茂永茂遂奔贛八月叛將白之裔入萬安江西巡撫曠昭被執知縣梁于溪死之于溪江都人崇禎十六年進士時唐王詔適至贛永茂乃與楊廷麟劉同升同舉兵未幾王召永茂為兵部右侍郎以張朝綬代甫任事擢元吉兵部右侍郎兼右副

都御史總督江西湖廣諸軍名朝綆還以同升代元吉
至贛同升已卒遂以元吉兼巡撫

順治三年三月廷麟將朝王元吉代守吉安初崇禎末
命中書舍人張同敞調雲南兵至是抵江西兩京已相
繼失因退還吉安廷麟留與共守用客禮待之其將趙
印選胡一青頻立功而元吉約束甚嚴諸將漸不悅時
有廣東兵亦以赴援至而新軍張安者汀贛間峒賊四
營之一驍勇善戰既降有復撫州功且招他營盡降元

吉以新軍足恃也蔑視雲南廣東軍二軍皆解體然安卒故為賊居贛淫掠遣援湖西所過殘破及是

大兵逼吉安諸軍皆內攜新軍又在湖西城中軍不戰潰城遂破元吉退屯皂口檄諭贛州極言雲南兵棄城罪其衆遂西去四月

大兵逼皂口元吉不能禦入贛城

大兵乘勝抵城下給事中楊文薦奉命湖南過贛入城共守禦城中賴之文薦元吉門生也元吉素有才泄事

精敏及失吉安士不用命昏然坐城上對將吏不交一言隔河大營遍山麓指為空營兵民從大營中至言敵勢甚輒叱為間諜斬之江西巡撫劉遠生令張琮者將兵趨湖東及贛圍急遠生自出城召琮於雩都贛人曰撫軍遁矣怒焚其舟拘遠生妻子俄遠生率琮兵至贛人乃大悔琮軍渡河抵梅林中伏大敗還至河爭舟多死於水遠生憤甚五月朔渡河再戰身先士卒遇大兵見獲復逃歸而新軍先往湖西者聞吉安復失仍

還雩都廷麟躬往邀之與

大兵戰梅林再敗乃散遣其軍而身入城與元吉同守
自遠生敗援軍皆不敢前六月望副將吳之蕃以廣東
兵五千至圍漸解未幾復合城中守如初王聞贛圍久
獎勞之賜名忠誠府加元吉兵部尚書文薦右僉都御
史使尚書郭維經來援維經與御史姚竒允沿途募兵
得八千人元吉部將汪起龍率師數千雲南援將趙印
選胡一青率師三千大學士蘇觀生遣兵如之兩廣總

督丁魁楚亦遣兵四千廷麟又收集散亡得數千先後至贛營於城外諸將欲戰元吉待水師至並擊而中書舍人來從諤募砂兵三千吏部主事龔茶兵部主事黎遂球募水師四千皆屯南安不敢下主事王其宐謂元吉曰水師帥羅明受海盜也桀驁難制茶遂球若慈母之奉驕子且今水涸巨舟難進豈能如約不聽及八月大兵聞水師將至即夜截諸江焚巨舟八十死者無算明受遁還舟中火藥戎器盡失於是兩廣雲南軍不戰

而潰他營亦稍稍散去城中僅起龍維經部卒四千餘人城外僅水師後營二千餘人參將謝志良擁衆萬餘雩都不進廷麟調廣西狼兵八千人踰嶺亦不即赴會聞汀州破人情益震懼十月初

大兵用嚮導夜登城鄉勇猶巷戰黎明兵大至城遂破元吉死之先是元吉禁婦女出城其家人潛載其妾縋城去元吉遣飛騎追還捶其家人故城中無敢出者及城破部將擁元吉出城元吉歎曰為我謝贛人使闔城

塗炭者我也我何可獨存遂赴水死年四十有四楊文薦字幼字京山人由進士為兵科給事中城破時病困不能起執送南昌絕粒而卒

郭維經字六修江西龍泉人天啟五年進士授行人崇禎三年遷南京御史疏陳時弊中有所舉刺帝責令指實乃極稱順天府尹劉宗周之賢力詆吏部尚書王永光谿刻及用人顛倒罪帝置不問六年秋溫體仁代周延儒輔政維經言執政不患無才患有才而用之排正

人不用之籌國事國事日非則委曰我不知坐視盜賊
日猖邊警日急止與二三小臣爭口舌角是非平章之
地幾成聚訟可謂有才邪帝切責之憂去久之起故官
北都變聞南都諸臣有議立潞王者維經力主福王王
立進應天府丞仍兼御史巡視中城俄上言聖明御極
將二旬一切雪耻除兇收拾人心之事絲毫未舉今偽
官縱橫於鳳泗悍卒搶攘於瓜儀焚戮剽掠之慘漸逼
江南而廊廟之上不聞動色相戒惟以慢不切要之務

盈庭而議乞命内外文武諸臣洗滌肺腸盡去刻薄偏私及恩怨報復故習一以辦賊復仇為事報聞尋遷大理少卿左僉都御史命專督五城御史察非常清輦轂明年二月隆平侯張拱日保國公朱國弼相繼以他事劾罷維經維經回籍唐王召為吏部右侍郎

順治三年五月

大兵圍贛州王乃命維經為吏兵二部尚書兼右副都御史總理湖廣江西廣東浙江福建軍務督師往援維

經與御史姚竒允募兵八千人入贛州與楊廷麟萬元
吉協守及城破維經入嵯峨寺自焚死竒允亦死之竒
允字有僕錢塘人由進士授南海知縣地富饒多盜賊
竒允絕苞苴力以弭盜為事政聲大起入為兵部主事
改監察御史巡按廣東未任與維經赴援遂同死

詹兆恒字月如廣信永豐人父士龍順天府尹兆恒舉
崇禎四年進士由甄寧知縣徵授南京御史疏陳盜鑄
之弊帝下所司察核十四年夏言燕齊二千里間寇盜

縱橫行旅阻絕四方餉金滯中途者至數百萬請急發
京軍勦滅又言楚豫之疆盡青磷白骨新徵舊逋斷無
從出請多方蠲貸帝竝采納明年賊陷含山犯無為劾
總督高斗光又明年秋賊陷廬州臨江欲渡陳內外合
防策再劾斗光請以史可法代斗光遂獲譴時江北民
避亂盡走南京兆恒慮賊謀闖入處之城外為嚴保伍
察非常奸宄無所匿福王立擢兆恒大理寺丞馬士英
薦阮大鍼令冠帶陞見兆恒言先皇手定逆案芟刈羣

究第一美政今者大仇未報乃忽名大鉞還之冠帶豈
不上傷先皇靈下短忠義氣哉疏奏命取逆案進覽兆
恒即上進而士英亦以是日進三朝要典大鉞竟起用
其秋奉命祭告尋進本寺少卿使事竣即旋里唐王立
拜兆恒兵部左侍郎佐黃道周協守廣信廣信破奔懷
玉山聚衆數千人自保尋進攻衢州之開化縣兵敗歿
於陣胡夢泰字友蠡廣信鉛山人崇禎十年進士除奉
化知縣邑人戴澳官順天府丞怙勢不輸賦夢泰捕治

其子其子走京師愬澳令劾去夢泰澳念州民不當劾長吏而刦於其子姑出一疏言天下不治由守令貪污以陰詆夢泰及得旨令指實其子即欲訐夢泰而澳念夢泰無可劾乃以嘉興推官文德翼平遙知縣王凝命實之給事中沈迅為兩人訴枉發澳隱情澳下詔獄除名夢泰聲益起十六年夏吏部會廷臣舉天下賢能有司十人夢泰與焉行取入都帝以畿輔州縣殘破欲得廉能者治之諸行取者悉出補夢泰得唐縣京師臨南

歸唐王時授兵科給事中奉使旋里

順治三年

大兵逼城下夢泰傾家募士與巡撫周定仍等守城圍數月城破夫婦俱縊死定仍南昌人崇禎十六年進士與萬文英胡竒偉胡甲桂舉兵保廣信唐王即以為右僉都御史巡撫其地城破死之文英亦南昌人初為鳳陽推官以子元亨代死得脫歸福王時起禮部主事丁艱不赴唐王授為兵部員外郎監黃道周諸軍協守廣

信諸軍敗於鉛山文英舉家赴水死奇偉進賢人歷官

兵部主事唐王授為湖東副使守廣信兵敗死之甲桂

字秋卿崑山人崇禎十六年以鄉試副榜貢入國學授

南昌通判遷永州同知以道梗改廣信至則南昌袁州

吉安俱失廣信止疲卒千人士民多竄徙會黃道周以

募兵至相與議城守已而道周敗歿勢益孤甲桂效死

不去城破就執諭降不從幽別室自經死有畢貞士者

貴溪人舉於鄉同守廣信城破赴水家人救之行至五

里橋望拜祖塋觸橋柱死

陳泰來字剛長江西新昌人崇禎四年進士由宣城知縣入為戶科給事中十五年冬都城戒嚴泰來陳戰守數策總督趙光忤言泰來與同官荆祚永素晰邊情行間奏報宜敕二臣參預報可泰來又自請假兵一萬肅清輦轂帝壯之即改授兵科出視諸軍戰守方畧召對中左門至軍中奏界嶺失事狀劾副將栢永鎮論死以功遷吏科右給事中乞假歸福王時起刑科右給事中

不赴唐王擢為太僕寺少卿與萬元吉同守贛州再擢右僉都御史提督江西義軍李自成敗走武昌其部下散掠新昌境泰來大破之初益王起兵建昌泰來欲從之同邑按察使漆嘉祉舉人戴國士持不可已而新昌破國士出降泰來惡之會上高舉人曹志明等兵起泰來與相結十二月攻取上新昌寧州殺國士妻子遂取萬載已而

大兵逼新昌守將出降泰來走界埠志明等從上高移

軍會之進攻撫州兵敗皆死

王養正字聖功泗州人崇禎元年進士授海鹽知縣遭
父喪服除起官秀水中大計補河南按察司照磨累遷
南康知府計殲巨寇鄧毛溪熊高一方賴之福王時進
副使分巡建昌南都既覆

大兵下江西巡撫曠昭棄南昌遁走瑞州列城望風潰
養正乃與布政夏萬亨知府王域推官劉允浩南昌推
官史夏隆起兵拒守閱三日有客兵內應城即破養正

等就執械至南昌與萬亨等同死其妻張氏聞之絕粒九日而死萬亨字元禮崑山人起家舉人南昌失守避建昌與養正同死妻顧子婦陸及一孫一孫女先赴井死僕婢死者復十餘人域字元壽松江華亭人舉於鄉授宿州學正流賊至佐有司捍禦有功屢遷工部主事權稅蕪湖都城陷諸權稅者多以自入域歎曰君父遭非常禍臣子反因以為利邪悉歸之南京戶部尋由郎中遷建昌知府城破械至南昌與允浩夏隆同日死允

浩掖縣人夏隆宜興人皆崇禎十六年進士時同死者
六人其一人失其姓名建昌人哀其忠哀而瘞之表曰
六君子之墓初建昌南城諸生有鄧思銘者聞北都陷
集其儕數十人為庠兵期朔望習射學技擊為國報仇
請於有司有司笑曰庠可兵邪衆志遂懈思銘鬱鬱不
得志明年城破死之建昌既破新城知縣譚夢開迎降
民潛導守關兵殺之夢開等與民互相殘彌月不靖唐
王以邵武貢生李翔為新城知縣翔至禽殺餘黨衆遂

散然民習於亂佃人以田主徵租斛大聚數千人譟縣
庭翔潛遣義兵三百詭稱鄭彩軍殺亂民明日復斬百
餘級亂乃靖彩兵數萬駐新城畏

大兵遁入關獨監軍張家玉新城人徐伯昌與翔共守
及

大兵逼家玉亦戰敗入關翔率民兵千餘出城拒擊

大兵從間道入城民兵皆散翔與伯昌皆死之伯昌字
子期唐王時由舉人授兵部主事改御史者也時江西

郡邑吏城守者又有李時興高飛聲時興福清人舉於鄉
厯官袁州同知攝府事會城已降時興力城守無何
守將蒲纓兵潰湖廣援將黃朝宣五營亦譟歸時興度
不能守自縊於萍鄉官舍一僕亦同死飛聲字克正長
樂人崇禎中由鄉舉授玉山知縣遷同知乞養去唐王
時黃道周出督師邀與偕令攝撫州事

大兵至遣家人懷印走謁王而身守城死焉

曾亨應字子嘉臨川人父棟廣東布政使亨應舉崇禎

七年進士歷官吏部文選主事十五年秋有詔起廢亨應以毛士龍李右讜喬可聘等十人上御史張懋爵劾其納賄行私亨應疏辨懋爵三疏力攻遂被謫去福王立之明年江西列城皆不守亨應命弟和應奉父入閩而已與艾南英揭重熙謀城守會永寧王慈炎招連子峒土兵數萬復建昌入撫州寓書亨應亨應募兵數百與相犄角一日方置酒宴客

大兵至亨應避石室其從弟指示之遂見執并執其長

子筠亨應顧筠曰勉之一日千秋母自負筠曰諾先受
刑死釋亨應縛諭之降不答就戮和應聞兄死曰烈哉
兄為忠臣兄子為孝子復何憾既奉父入閩又走避之
肇慶乃拜辭其父投井死先是棟弟棫為蒲圻知縣棫
兄益為貴州僉事竝死難人稱曾氏五節云始亨應為
懋爵所許朝士頗疑之後亨應死節而懋爵竟降李自
成為直指使

揭重熙字祝萬臨川人崇禎十年以五經登進士授福

寧知州福王時擢吏部考功主事外艱歸撫州破與同里曾亨應先後舉兵唐王命以故官聯絡建昌兵戰敗被劾用大學士曾櫻薦以考功員外郎兼兵科給事中從大學士傅冠辦湖東兵事瀘溪告警冠不能救重熙劾解冠任兵事遂皆委重熙江西巡撫劉廣允戰敗就執復用櫻薦擢右僉都御史代廣允攻撫州不克而退俄聞汀州失解兵入山永明王拜重熙兵部尚書兼右副都御史總督江西兵召募萬餘人薄邵武敗還金聲

桓左良玉將也已降於

大清復乘間為亂據南昌

大兵攻討之聲桓死諸軍盡散獨張自盛衆數萬走閩
重熙入其軍約廣信曹大鎬竝進自盛掠邵武戰敗就
執重熙走依大鎬百丈礮適大鎬還軍鉛山惟空營在
衆就營炊食

大兵偵得之率衆至射重熙中項執至建寧下之獄重
熙日呼高皇帝祈死不得至冬十一月昂首受刃顏色

不改傳鼎銓字維新重熙同邑人崇禎十三年進士除翰林檢討李自成陷京師鼎銓出謁賊敗南還唐王時曾櫻薦鼎銓命予知府銜赴贛州軍自效尋復其故官贛州破退隱山中已聞金聲桓叛鼎銓舉兵以應永明王命為兵部右侍郎兼翰林院侍讀學士聲桓滅鼎銓往來自盛大鎬軍

順治八年至廣信張村為守將所執繫南昌獄諭之降不從令作書招重熙亦不從八月朔乃從容就刑鼎銓

自降流賊為鄉人非笑嘗欲求一死所至是得死鄉人更賢鼎銓已重熙大鎬相繼敗都昌督師余應桂亦以是歲亡江右兵遂盡

陳子壯字集生南海人萬曆四十七年以進士第三人授翰林編修天啟四年典浙江鄉試發策刺閹豎魏忠賢怒假他事削子壯及其父給事中熙昌籍崇禎初起子壯故官累遷禮部右侍郎流賊犯皇陵帝素服召對廷臣子壯言今日所急在收人心宜下罪己詔激發忠

義帝納之乃會諸臣列上蠲租清獄使過宥罪等十二事帝以海內多故思廣羅賢才下詔援祖訓郡王子孫文武堪任用者得考驗授職子壯慮為民患立陳五不可會唐王上疏歷引前代故事詆子壯遂除子壯名下之獄坐贖徒歸久之廷臣交薦起故官協理詹事府未上京師陷福王立起禮部尚書至蕪湖南京亦失守乃歸唐王立福建召相子壯以前議宗室事有宿憾辭不行

順治三年汀州遘變丁魁楚等擁立桂王子永明王由榔於肇慶蘇觀生又議立唐王弟聿錫子壯沮不得退居邑之九江村永明王授子壯東閣大學士兼兵部尚書督廣東福建江西湖廣軍務會

大兵入廣州聿錫見執死子壯止不行明年春張家玉陳邦彥及新會王興潮陽賴其肖先後起兵子壯亦以八月起兵九江村兵多蠻戶番鬼善戰乃與陳邦彥約共攻廣州結故指揮使楊可觀等為內應事洩可觀等

死子壯駐五羊驛為

大兵擊敗走還九江村長子上庸陣歿會故御史麥而
炫破高明迎子壯以故主事朱實蓮攝縣事實連子壯
邑子也九月

大兵克高明實蓮戰死子壯而炫俱執至廣州不降就
戮子壯母自縊永明王贈子壯番禺侯謚文忠廕子上
圖錦衣衛指揮使而炫字章闇高明人由進士歷上海
安肅知縣唐王時擢御史實蓮字子潔由舉人歷官刑

部主事初聿鏞之自立於廣州也召南海霍子衡為太僕卿子衡字覺商舉萬厯中鄉試厯袁州知府及官太僕時而廣州不守子衡乃召妾莫氏及三子應蘭應荃應芷語之曰禮臨難毋苟免若輩知之乎三子皆應曰惟大人命子衡援筆大書忠孝節烈之家六字懸中堂易朝服北向拜又易緋袍謁家廟先赴井死妾從之應蘭偕妻梁氏及一女繼之應荃應芷偕其妻徐氏區氏又繼之惟三孫得存有小婢見之亦投井死

張家玉字元子東莞人崇禎十六年進士改庶吉士李自成陷京師被執上書自成請旌已門為翰林院庶吉士張先生之廬而褒恤范景文周鳳翔等隆禮劉宗周黃道周尊養史可程魏學濂自稱殷人從周願學孔子稱自成大順皇帝自成怒召之入長揖不跪縛午門外三日復脅之降恠以極刑卒不動自成曰當磔汝父母乃跪時其父母在嶺南家玉遽自屈人咸笑之賊敗南歸阮大鍼等攻家玉薦宗周道周於賊令收人望集羣

黨家玉遂被逮明年南都失守脫歸從唐王入福建擢翰林侍講監鄭彩軍出杉關謀復江西解撫州之圍
順治三年風聞

大兵至彩即奔入關家玉走新城

大兵來攻之出戰中矢墮馬折臂走入關令以右僉都御史巡撫廣信廣信已失請募兵惠潮說降山賊數萬
將赴贛州急會

大兵克汀州乃歸東莞四年家玉與舉人韓如璜結鄉

兵攻東莞城知縣鄭霖降乃籍前尚書李覺斯等貲以
犒士甫三日

大兵至家玉敗走奉表永明王進兵部尚書無何

大兵來擊如璜戰死家玉走西鄉祖母陳母黎妹石寶
俱赴水死妻彭見執不屈死鄉人殲焉西鄉大豪陳文
豹奉家玉取新安襲東莞戰赤岡未幾

大兵大至攻數日家玉敗走鐵岡文豹等皆死覺斯怨
家玉甚發其先壟毀及家廟盡滅家玉族村市為墟家

王過故里號哭而去道得衆數千取龍門博羅連平長寧遂攻惠州克歸善還屯博羅

大兵來攻家玉走龍門復募兵萬餘人家玉好擊劍任俠多與草澤豪士游故所至歸附乃分其衆為龍虎犀象四營攻據增城十月

大兵步騎萬餘來擊家玉三分其兵犄角相救倚深谿高崖自固大戰十日力竭而敗被圍數重諸將請潰圍出家玉歎曰矢盡礮裂欲戰無具將傷卒斃欲戰無人

烏用徘徊不決以頸血濺敵人手哉因徧拜諸將自投野塘中以死年三十有三年永明王贈家玉少保武英殿大學士吏部尚書增城侯諡文烈其父兆龍猶在以子爵封之陳象明字麗南家玉同邑人崇禎元年進士授戶部主事權稅淮安以清操聞屢遷饒州知府忤巡按御史被劾謫兩淮鹽運副使累遷湖南道副使唐王時總督何騰蛟令徵餉廣西會永明王立廣東地盡失象明徵調土兵與陳邦傳連營東至梧州榕樹潭遇

大兵戰敗死之廣東之失也龍門破里人廖翰標以二
幼子託從父從容自縊死番禺破里人梁萬爵曰此志
士盡節之秋也赴水死翰標天啟中舉人官江西新城
知縣庶惠民為建祠萬爵字天若唐王時舉人

陳邦彥字令斌順德人為諸生意氣豪邁福王時詣闕
上政要三十二事格不用唐王聿鍵讀而偉之既自立
即其家授監紀推官未任舉於鄉以蘇觀生薦改職方
主事監廣西狼兵援贛州至嶺聞汀州變勸觀生東保

潮惠不聽會丁魁楚等已立永明王監國於肇慶觀生

遣邦彥入賀王因贛州破懼逼已西走梧州邦彥甫入
謁而觀生別立唐王聿錡於廣州邦彥不知也夜二鼓
王遣中使十餘輩召入舟中王太后垂簾坐王西向坐
魁楚侍語以廣州事邦彥請急還肇慶正大位以繫人
心命南雄勅卒取韶制粵東十郡之七而委其三於唐
王代我受敵從而乘其敝王大悅立擢兵科給事中齎
敕還諭觀生抵廣州聞使臣彭耀被殺乃遣從人授觀

生救而自以書曉利害觀生猶豫累日欲議和會聞永明王兵大敗不果邦彥遂變姓名入高明山中

順治三年冬十二月

大兵破廣州觀生死列城悉下邦彥乃謀起兵初贛州萬元吉遣族人萬年募兵於廣得余龍等千餘人未行而贛州失龍等無所歸聚甘竹灘為盜他潰卒多附至二萬餘人總督朱治憫招降之既而譟歸四年春

大兵定廣州克肇慶梧州敗走治憫殺魁楚前驅抵平

樂永明王方自梧道平樂走桂林勢危甚邦彥乃說龍
乘間圖廣州而已發高明兵由海道入珠江與龍會且
遺張家玉書曰桂林累卵但得牽制毋西潯平間可完
葺是我致力於此而收功於彼也家玉以為然然龍卒
故無紀律

大兵自桂林還救揚言取甘竹灘龍等無所歸輒退邦
彥亦却歸既乃遣門人馬應芳會龍軍取順德無何
大兵至龍戰敗應芳見執赴水死四月龍再戰黃連江

亦敗歿

大兵攻家玉於新安邦彥乃棄高明收餘衆徇下江門據之初廣州之圍

大兵知謀出邦彥求其家獲妾何氏及二子厚遇之為書招邦彥邦彥判書尾曰妾辱之子殺之身為忠臣義不顧妻子七月與陳子壯密約復攻廣州子壯先至謀洩將引退邦彥軍亦至謀伏兵禺珠洲側伺

大兵還救會城而縱火以焚舟子壯如其計果焚舟數

十

大兵引而西邦彥尾之會日暮子壯不能辨旗幟疑皆
大兵也陣動

大兵順風追擊遂大潰子壯奔高明邦彥奔三水八月
清遠指揮白常燦以城迎邦彥乃入清遠與諸生朱學
熙嬰城固守邦彥自起兵日一食夜則坐而假寐與其
下同勞苦故軍最強嘗分兵救諸營之敗者至是精銳
盡喪外無援軍越數日城破常燦死邦彥率數十人巷

戰肩受三刃不死走朱氏園見學熙縊拜哭之旋見執
饋之食不食繫獄五日就戮邦彥死子壯見執踰月家
玉亦自沉永明王贈邦彥兵部尚書謚忠愍廕子錦衣
指揮

蘇觀生字宇霖東莞人年三十始為諸生崇禎中由保
舉授無極知縣總督范志完薦其才進永平同知監紀
軍事尋遷戶部員外郎十七年京師陷脫還南京進郎
中催餉蘇州明年五月南京破走杭州會唐王聿鍵至

觀生謁王王與語大悅聯舟入福建與鄭芝龍鴻逵兄弟擁立王擢為翰林學士旋進禮部右侍郎兼學士設儲賢館分十二科招四方士令觀生領之觀生矢清操稍有文學而時望不屬王以故人恩眷出廷臣右乃超拜東閣大學士參機務廣生數贊王出師見鄭氏不足有為事權恣為所握請王赴贛州經畧江西湖廣王乃議觀生先行明年觀生赴贛州大徵甲兵餉不繼竟不能出師時

順治三年三月

大兵破吉安總督萬元吉乞援觀生遣二百人往元吉
令協守綿津灘遇

大兵潰走元吉仍退回贛州

大兵遂圍城觀生走南康贛人數告急不敢援六月

大兵退屯水西觀生發三千人助贛守久之他將戰敗
九月

大兵再攻贛州三千人皆引去時觀生移駐南安閩中

急不能救聿鍵死於汀州贛州亦破觀生退入廣州監紀主事陳邦彥勸令觀生疾趨惠潮扼漳泉兩粵可自保觀生不從會丁魁楚等議立永明王觀生欲與共事魁楚素輕觀生拒不與議呂大器亦叱辱之適唐王弟聿鏞與大學士何吾驕自閩至南海關捷先番禺梁朝鍾首倡兄終弟及議觀生遂與吾驕及布政使顧元鏡侍郎王應華曾道唯等以十一月二日擁立王就都司署為行宮即日封觀生建明伯掌兵部事進吾驕

等秩擢捷先吏部尚書旋與元鏡應華道唯竝拜東閣
大學士分掌諸部時倉卒舉事治宮室服御鹵簿通國
奔走夜中如晝不旬日除官數千冠服皆假之優伶云
永明王監國肇慶遣給事中彭耀主事陳嘉謨齋敕往
諭耀順德人過家拜先廟託子於友人至廣州以諸王
禮見備陳天潢倫序及監國先後語甚切至因厯詆觀
生諸人觀生怒執殺之嘉謨亦不屈死乃治兵日相攻
以番禺人陳際泰督師與永明王總督林佳鼎戰於三

水兵敗復招海盜數萬人遣大將林察將十二月二日
戰海口斬佳鼎觀生意得務粉飾為太平事而委任捷
先及朝鍾捷先由進士厯官監司小有才便筆札朝鍾
舉於鄉善談論浹旬三遷至祭酒有楊明競者潮州人
好為大言詭稱精兵滿惠潮間可十萬即特授惠潮巡
撫朝鍾語人內有捷先外有明競強敵不足平矣觀生
亦器此三人事必咨之又有梁蓋者妄人也觀生才之
用為吏科都給事中與明競大納賄賂日薦用數十人

觀生本乏猷畧兼總內外任益昏督招海盜資捍禦其
衆白日殺人縣肺腸於貴官之門以示威城內外大擾
時

大兵已下惠潮長吏皆降附即用其印移牒廣州報無
警觀生信之是月十五日聿鏘視學百僚咸集或報

大兵已逼觀生叱之曰潮州昨尚有報安得遽至此妄
言惑衆斬之如是者三

大兵已自東門入觀生始名兵搏戰兵精者皆西出倉

卒不能集觀生走蓋所問計曰死爾復何言觀生入東房蓋入西房各拒戶自縊觀生慮其詐稍留聽之蓋故扼其吭氣湧有聲且推几仆地久之寂然觀生信為死遂自經明日蓋獻其屍出降朝鍾聞變赴池為鄰人救出自經死聿鏤方事閱射急易服踰垣匿王應華家俄縋城走為追騎所獲饋之食不受曰我若飲汝一勺水何以見先人地下投繯而絕吾駒應華等悉降

贊曰自南都失守列郡風靡而贛以彈丸獨憑孤城誓

死拒命豈其兵力果足恃哉激於義而衆心固也迨汀
贛繼失危近目睫而肇慶廣州日治兵相攻自取兩敗
蓋天連其禍如發蒙振槁無煩驅除矣

明史卷二百七十八

欽定四庫全書

明史卷二百七十八考證

萬元吉傳楊嗣昌薦其才

臣嚴福按十三年十二月

嗣昌在重慶戒期進兵討賊而賀人龍左良玉皆於
嗣昌有怨望元吉知之進曰軍心不一未可以戰盍
令前軍躡賊後軍為繼中軍從間道出梓潼扼歸路
以濟此此萬全策也嗣昌不聽既而追賊及於開縣
人龍兵先大譟歸良玉兵亦攜阻不前賊還戰諸軍

大潰嗣昌曰吾悔不用萬元吉之言見綏寇紀略謹
附考

陳子壯傳累遷禮部右侍郎

臣嚴福按子壯在禮部

時嘗謁溫體仁體仁言皇上神聖臣下不宜異同子
壯曰世宗皇帝最英明然祔廟之議勲戚之獄當日
上猶執持不已皇上威嚴有類世宗公之恩過孰與
張挂但以將順而廢匡救恐非善則歸君之義也溫
意沮遂成嫌隙見通鑑紀事謹附考

附明史卷二百七十八考証

乾隆四十一年

賜諡諸臣

陳子壯 專諡忠簡

郭維經 詹兆恒 揭重熙 陳邦彥

以上通諡忠烈

楊廷麟 萬元吉 楊文薦 陳泰來

以上通諡忠節

周 瑚 王明浚 萬發祥 林 琦 王其宓

黎遂球 柳昂霄 魯嗣宗 錢謙亨 袁從鶚

劉孟錡 劉應試 吳國球 郭寧登 胡 績

林逢春 陳 烈 王養正 夏萬亨 王 域

劉允浩 史夏蔭 魯亨應 麥而炫 朱實蓮

霍子衡 韓如璜 陳象明 白常燦

以上通諡烈愍

徐必達 彭期年 龔 荃 盧觀象 梁于溪

姚竒允 胡夢泰 周定仍 萬文英 胡竒偉

胡甲桂 李翔 徐伯昌 李時興 高飛聲

廖翰標 梁萬爵 梁朝鍾

以上通謚節愍

欽定四庫全書

卷二百七十八

欽定四庫全書薈要卷六千八百七十二

史部

明史卷二百七十九

大學士張廷玉等奉 敕修

列傳第一百六十七

呂大器

文安之

樊一衡

范文光
詹天顏

吳炳

王錫衮

堵允錫

嚴起恒

朱天麟

張孝起

楊畏知

吳貞毓 高

勅等

呂大器字儼若遂寧人崇禎元年進士授行人擢吏部
 稽勲主事更歷四司乞假歸以邑城庫惡倡議修築工
 甫竣賊至佐有司拒守城獲全詔增秩一等出為關南
 道參議遷固原副使巡撫丁啟睿檄大器討長武賊用
 穴地火攻法滅之十四年擢右僉都御史巡撫甘肅劾
 總兵官柴時華不法解其職立遣副將王世寵代之時
 華乞兵西部及土魯番為變大器令世寵討敗時華及

西部時華自焚死塞外額爾德尼黃台吉等擁衆乞賞
謀犯肅州守城拒走之大器假賞犒名毒飲馬泉殺其
衆無算又遣總兵官馬彊督撫將世寵等討羣番為亂
者斬首七百餘級撫三十八族而還又擊敗其餘黨西
陲畧定十五年六月擢兵部添駐右侍郎大器負才性
剛躁善避事見天下多故懼當軍旅任力辭且投揭吏
科言己好酒色財必不可用帝趣令入京詭稱疾不至
嚴旨切責亦不至命所司察奏明年三月始至命以本官

兼右僉都御史總督保定山東河北軍務時畿輔未解
嚴大器及諸將和應薦張汝行馳扼順義牛欄山總督
趙光抃集諸鎮師大戰螺山應薦陣亡他將亦多敗大
器所部無失事增俸一等五月以保定息警罷總督官
特設江西湖廣應天安慶總督駐九江大器任之湖北
地已失武昌亦陷左良玉駐九江稱疾不進以侯恂故
疑大器圖已語具良玉傳中大器詣榻前與慰勞疑稍
釋而張獻忠大躡湖南分兵陷袁州吉安大器急遣部

將及良玉軍連破之樟樹鎮峽江永新二郡皆復已而建昌撫州陷良玉大器不和兵私闕焚南昌關廂廷議因改大器南京兵部右侍郎以袁繼成代十七年四月京師報陷南京大臣議立君大器主錢謙益雷縉祚言立潞王議未定而馬士英及劉澤清諸將擁福王至福王立遷大器吏部左侍郎大器以異議絀自危乃上疏劾士英言其擁兵入朝覲留政地翻先皇手定逆案欲躋阮大鍼中樞其子以銅臭為都督女弟夫未履行陣

授總戎媼姪越其杰田仰楊文驄先朝罪人盡登膺任
亂名器夫吳姓鄭三俊臣不謂無一事失而端方諒直
終為海內正人之歸士英大鉞臣不謂無一技長而奸
回邪慝終為宗社無窮之禍疏入以和衷體國答之未
幾澤清入朝劾大器續祚懷異圖大器遂乞休去以手
書監國告廟文送內閣明無他士英憾未已令太常少
卿李沾劾之遂削大器籍復命法司逮治之以蜀地盡
失無可踪跡而止大器既去沾得超擢左都御史謙益

亦以附士英大鉞得為禮部尚書獨續祚論死明年唐
王召為兵部尚書兼東閣大學士道梗久之至汀州失
奔廣東與丁魁楚等擁永明王監國令以原官兼掌兵
部事久之進少傅盡督西南諸軍代王應熊賜劔便宜
從事至涪州與將軍李占春深相結他將楊展于大海
胡雲鳳袁韜武大定譚弘譚諳譚文以下皆受大器約
束宗室朱容藩自稱天下兵馬副元帥據夔州大器檄
占春大海雲鳳討殺容藩大器至思南得疾次都勻而

卒王謚為文肅

文安之夷陵人天啟二年進士改庶吉士授檢討除南京司業崇禎中就遷祭酒為薛國觀所構削籍歸久之言官交薦未及召而京師陷福王時起為詹事唐王復召拜禮部尚書安之方轉側兵戈間皆不赴永明王以瞿式邦薦與王錫衮竝拜東閣大學士亦不赴

順治七年六月安之謁王梧州安之敦雅操素淡宦情遭國變絕意用世至是見國勢愈危慨然思起扶之乃

就職時嚴起恒為首輔王化澄朱天麟次之起恒讓安之而自處其下孫可望再遣使乞封秦王安之持不予其後桂林破王奔南寧

大兵日逼雲南又為可望據不可往安之念川中諸鎮兵尚強欲結之共獎王室乃自請督師加諸鎮封爵王從之加安之太子太保兼吏兵二部尚書總督川湖諸處軍務賜劔便宜從事進諸將王光興郝永忠劉體仁袁宗第李來亨王友進塔天寶馬雲翔郝珍李復榮譚

弘譚詣譚文黨守素等公侯爵即令安之齎敕印行可望聞而惡之又素銜前阻封議遣兵伺於都勻邀止安之追奪光興等敕印留數月乃令入湖廣安之遠客他鄉無所歸復赴貴州將謁王於安龍可望坐以罪戍之畢節衛先是可望欲設六部翰林等官慮人議其僭乃以范鑛馬兆義任傑萬年策為吏戶禮兵尚書竝加行營之號後又以程源代年策而傑最寵與方于宣屢勸進可望令待王入黔議之王久駐安龍可望遂自設內

閣六部等官以安之為東閣大學士安之不為用久之
走川東依劉體仁以居李赤心高必正等久竄廣西賓
橫南寧間赤心死養子來亨代令其眾推必正為主必
正又死其眾食盡且畏

大兵逼率眾走川東分據川湖間耕田自給川中舊將
王光興譚弘等附之眾猶數十萬

順治十六年正月王奔永昌安之率體仁宗第來亨時
十六營由水道襲重慶會譚弘譚詣殺譚文諸將不服

安之欲討弘詣弘懼率所部降於

大兵諸鎮遂散時王已入緬甸地盡失安之不久鬱鬱而卒

樊一蘅字君帶宜賓人父垣常德知府一蘅舉萬曆四十七年進士知安義襄陽累官吏部郎中請告歸崇禎三年秋遷榆林兵備道議流賊多榆林人又久荒饑民益相挺為盜一蘅撫創殘修戎備討斬申在庭馬丙貴平不沾泥累被薦遷監軍副使再遷右參政分巡關南

總兵曹文詔敗歿羣賊迫西安總督洪承疇令一薈監
左光先張應昌軍連破賊擊走混天星賊逼漢中瑞王
告急一薈偕副將羅尚文往救會承疇大軍至賊乃走
進按察使偕副將馬科賀人龍屢挫祁總管於漢中降
之十二年擢右僉都御史代鄭崇儉巡撫寧夏被劾罷
歸十六年冬用薦起兵部右侍郎總督川陝軍務道阻
命不達

順治元年福王立於南京復申前命時張獻忠已據全

蜀惟遵義未陷一衛與王應熊避其地既拜命檄諸郡
舊將會師大舉會巡撫馬乾復重慶松潘副將朱化龍
同知詹天顏擊斬賊將王運行復龍安茂州一衛乃起
舊將甘良臣為總統副以侯天錫屠龍合參將楊展游
擊馬應試余朝宗所攜潰卒得三萬人明年三月攻叙
州應試朝宗先登展等繼至斬馘數千級偽都督張化
龍走遂復其城一衛乃搗師江上初乾復重慶賊將劉
廷舉走求救於獻忠獻忠命養子劉文秀攻重慶水陸

竝進副將曹英與參政劉麟長自尊義至與部將于大海李占春張天相等夾擊破賊兵數萬英威兵大振諸別將皆屬兵二十餘萬奉一蘄節制楊展既復叙州賊將馮雙禮來寇每戰輒敗孫可望以大衆援之隔江持一月糧盡一蘄退屯古蘭州展退屯江津賊退截朱化龍及僉事蔡肱明於羊子嶺化龍率番騎數百衝賊兵賊驚潰死者滿山谷化龍以軍孤還守舊地他將復連敗賊於摩泥滴水一蘄乃命展應試取嘉定邛眉故總

兵官賈連登及其中軍楊維棟取資簡天錫高明佐取瀘州占春大海守忠涪其他據城邑奉征調者洪雅則曹勛及監軍副使范文光松茂則監軍僉事詹天顏夔萬則譚弘譚誥一蘅乃移駐納溪居中調度與督師應熊會瀘州檄諸路刻期竝進獻忠頗懼盡屠境內民沈金銀江中大焚宮室火連月不滅將棄成都走川北明年春展盡取上川南地屯嘉定與勛等相聲援而應熊及王祥在遵義乾英在重慶皆宿重兵賊勢日盛惟保

寧順慶為賊將劉進忠所守進忠又數敗獻忠怒遣孫可望劉文忠王尚禮狄三品王復臣等攻川南郡縣應熊一蘅即令展天錫龍應試及顧存志莫宗文張登貴連營捷為叙州以禦之賊連戰不利英祥乘間趨成都獻忠立召可望等還又聞

大清兵入蜀境劉進忠降大懼七月棄成都走順慶尋入西充之鳳凰山至十二月

大清兵奄至射殺獻忠賊降及敗死者二三十萬可望

等率殘卒南奔驟至重慶英出不意戰敗死於江賊遂陷綦江應熊避之畢節衛踰月賊陷遵義入貴州

大清兵追至重慶巡撫乾敗死遂入遵義以餉乏旋師王祥等復取保寧二郡一衛再駐江上為收復全蜀計乃列上善後事宜及諸將功狀於永明王拜一衛戶兵二部尚書加太子太傅祥展天錫等進爵有差時應熊已卒而宗室朱容藩故偏沅巡撫李乾德竝以總制至楊喬然江爾文以巡撫至各自署置官多於民諸將素

韜據重慶于大海據雲陽李占春據涪州譚詣據巫山
譚文據萬縣譚弘據天字城侯天錫據永寧馬應試據
蘆衛王祥據遵義楊展據嘉定朱化龍曹勛仍據故地
搖黃諸家據夔州夾江兩岸而李自成餘孽李赤心等
十三家亦在建始縣一衛令不行保叙州一郡而已
順治五年容藩自稱楚世子建行臺夔州稱制封拜時
喬然已進總督而范文光詹天顏巡撫川南北呂大器
以大學士來督師皆惡容藩謀誅之六年春容藩遂為

占春所敗走死雲陽初辰與祥有隙遣子璟新攻之璟
新先襲殺應試與祥戰敗歸乾德利展富說韜大定殺
展分其貲一蘅詣乾德諸鎮亦皆憤有離心秋九月孫
可望遣白文選攻殺降其衆二十餘萬盡得遵遵義重
慶一蘅益孤七年秋可望又使劉文秀大敗武大定兵
長驅至嘉定大定韜皆降乾德投水死文秀兵復東譚
弘譚詣譚文盡降占春大海降於

大清明年正月文秀還雲南留文選守嘉定劉鎮國守

雅州三月

大清兵南征文選鎮國挾曹勛走文光天顏化龍相繼
死一蘅時已謝事避山中至九月亦遭疾死文武將吏
盡亡范文光內江人天啟初舉於鄉崇禎中歷官工部
主事南京戶部員外郎告歸十七年張獻忠亂蜀文光
偕邛州舉人劉道貞蘆山舉人程翔鳳雅州諸生傅元
修洪其仁等舉義兵奉鎮國將軍朱平榘為蜀王推黎
州參將曹勛為副總兵統諸將而文光以副使為監軍

道貞等授官有差勛敗賊雅州龍鶴山追至城下反為
所敗退守小關山十一月文光督參將黎神武攻雅州
不克明年九月神武合雅州土漢兵再擊賊將文能奇
於雅州敗績偽監司郝孟旋守綿州文光翔鳳遣間使
招之孟旋襲殺守雅州賊以城來歸文光等入居之獻
忠死文光保境如故永明王命為右僉都御史巡撫川
南而以安綿道詹天顏巡撫川北總督李乾德殺楊展
文光惡之遂入山不視事

大清兵克嘉定文光賦詩一章仰藥死天顏兵敗被執亦死之天顏龍巖人起家選貢生

吳炳宜興人萬曆末進士授蒲圻知縣崇禎中歷官江西提學副使江西地盡失流寓廣東永明王擢為兵部右侍郎從至桂林令以本官兼東閣大學士仍掌部事又從至武岡

大兵至王倉猝奔靖州令炳扈王太子走城步吏部主事侯偉時從之既至城已為

大兵所據遂被執送衡州炳不食自盡於湘山寺偉時亦死之偉時公安人崇禎中進士歷官吏部考功主事罷官至是補官數月即遭難

王錫衮祿豐人天啟二年進士改庶吉士授檢討崇禎中累官少詹事十三年擢禮部右侍郎明年秋尚書林欲楫出視孝陵錫衮以左侍郎掌部事帝禁內臣干預外政敕禮官稽先朝典制以聞錫衮等備列諸監局職掌而不及東廠提督內臣王德化言東廠之設始永樂

十八年國朝典彙可據禮官覆議不及請解臣職停廠
不設錫衮等言典彙雖載此條但係下文箋註臣等以
正史無文故不敢妄引帝不聽錫衮復抗疏請罷廠亦
不允二月帝再耕藉田錫衮因言頻歲旱蝗三餉疊派
請量除加徵嚴核蠹餉俾農夫樂生又以時方急才請
召還故侍郎陳子壯顧錫疇故祭酒倪元璐文安之且
乞免黃道周永戍給事中沈允培請增天下解額錫衮
因言南畿浙江人文更盛宜培增又言舉人不第有三

十年不謁選者宜定制數科不售即令服官從之欲楫
還朝錫袞調吏部尚書李日宣下獄遂掌部事帝性純
孝嘗以秋夜感念聖母孝純太后遂欲終身蔬食錫袞
疏諫帝嘉其寓愛於規進秩一等尋解部務直講筵十
六年憂歸唐王立拜禮部尚書兼東閣大學士永明王
立申前命皆不至土酋沙定洲作亂執至會城詭草錫
袞疏上永明王言定洲忠勇請代黔國公鎮雲南疏既
行以高示之錫袞大恨愬上帝祁死居數日竟卒

堵允錫字仲緘無錫人崇禎十年進士歷官長沙知府
山賊掠安化寧鄉官軍數敗允錫督鄉兵破滅之又殺
醴陵賊魁遂以知兵名十六年八月賊陷長沙允錫朝
覲還賊已退明年六月福王命為湖廣參政分守武昌
黃州漢陽左良玉稱兵總督何騰蛟奔長沙令攝湖北
巡撫事駐常德唐王立拜右副都御史實授巡撫李自
成死衆擁其兄子錦為主奉自成妻高氏及高氏弟一
功驟至澧州擁衆三十萬言乞降遠近大震允錫議撫

之騰蛟亦馳檄至乃躬入其營開誠慰諭稱詔賜高氏
命服錦一功蟒玉金銀器犒其軍皆踴躍拜謝乃即軍
中宴之導以忠孝大義數千言明日高氏出拜謂錦曰
堵公天人也汝不可負別部田見秀劉汝魁等亦來歸
唐王大喜加允錫兵部右侍郎兼右僉都御史總制其
軍手書獎勞授錦御營前部左軍一功右軍竝掛龍虎
將軍印封列侯賜錦名赤心一功名必正他部賞賚有
差號其營曰忠貞封高氏貞義夫人賜珠冠綵幣命有

司建坊題曰淑贊中興允錫遂與赤心等深相結倚以
自強然赤心書疏猶稱自成先帝稱高氏太后云已而
袁宗第劉體仁諸營先歸騰蛟者亦引與赤心合衆益
盛允錫以芻糧難繼令散處江北就食明年正月騰蛟
大舉期諸軍盡會岳州獨赤心先至餘逗遛卒不進永
明王立進允錫兵部尚書兵制如故

順治四年永明王立赤心等攻荊州月餘

大清兵援荊州赤心等大敗步入蜀數日不得食乃

散入施州衛聲言就食湖南時王在武岡劉承允懼為赤心所并計非允錫不能禦乃加允錫東閣大學士封光化伯賜劍便宜從事允錫所請得給空敕鑄印頒賜秦中舉兵者時頗議其專承允欲殺騰蛟允錫劾其罪

八月

大兵破武岡及寶慶常德辰沅允錫走永順土司尋赴貴陽抵遵義乞師於皮熊王祥又入施州請忠貞營軍會楚宗人朱容藩偽稱監國天下兵馬副元帥擅居夔

州御史錢邦芑傳檄討之五年正月允錫見容藩責以大義曉譬利害散其黨未幾金聲桓李成棟叛我

大清以江西廣東附永明王於是馬進忠王進才曹志建李赤心高必正等乘間取常德桃源澧州臨武藍山道州靖州荆門宜城諸州縣進忠赤心必正皆封公允錫與進忠有隙令赤心必正爭進忠所取常德進忠盡焚廬舍而去赤心等棄空城引而東所至守將皆燒營棄城走湖南已復州縣為一空允錫乃率赤心等入湘

潭與騰蛟會騰蛟令允錫向江西而自率進忠等向長沙六年正月兵方逼長沙騰蛟在湘潭被執諸軍遂散赤心等走廣西緣道掠衡永郴桂允錫與胡一青守衡州戰敗走桂陽初赤心等入廣西龍虎關守將曹志建惡其淫掠竝惡允錫允錫不知也或說志建允錫將召忠貞營圖志建志建夜發兵圍允錫殺從卒千餘允錫及子逃入富川猛峒志建索之急猛潛送允錫於監軍僉事何圖復間關達梧州會王遣大臣嚴起恒劉湘客

安輯忠貞營至梧而赤心等已走賓橫二州乃載允錫
謁王於肇慶志建遷怒圖復誘殺之闔門俱盡允錫至
肇慶時馬吉翔及李元允袁彭年等皆專柄各樹黨允
錫乃結歡於吉翔激赤心等東來與元允為難移書瞿
式耜欲間元允託言王有密敕令已與式耜圖元允王
頗不悅元允黨丁時魁金堡又論其喪師失地乃令總
統兵馬移駐梧州允錫以赤心等不足恃欲遙結孫可
望為強援矯王命封為平遼王允錫尋至潯州自恨發

病十一月卒王贈允錫潯國公謚文忠

嚴起恒浙江山陰人崇禎四年進士歷廣州知府遷衡
永兵備副使十六年張獻忠躡湖南吏民悉遁竄起恒
獨堅守永州賊亦不至唐王時擢戶部右侍郎總督湖
南錢法永明王立令兼督湖南軍餉

順治四年王駐武岡拜起恒禮部尚書兼東閣大學士
仍領錢法王走靖州起恒從不及避難萬村已知王在
柳州間道往從之從返桂林復從至柳州南寧李成棟

叛

大起以廣東附於王起恒從王至肇慶與王化澄朱天麟同入直無何化澄天麟相繼罷王士俊繼何吾駒為首輔起恒次之時朝政決於成棟子元允都御史袁彭年少詹事劉湘客給事中丁時魁金堡蒙正發五人附之攬權植黨人目為五虎起恒居其間不能有所匡正然起恒潔廉遇事持平與文安侯馬吉翔司禮中官龐天壽共患難久無所忤而五虎憾起恒競詆為邪黨王

在梧州尚書吳貞毓等十四人合疏攻五虎下湘客等
獄欲寘之死起恒顧跪王舟立救貞毓等竝惡之乃請
召還化澄而合攻起恒給事中雷德復劾其二十餘罪
比之嚴嵩王不悅奪得復官起恒力求罷王輒留之不
得放舟竟去會勛國公高必正入覲王貞毓欲藉其力
以傾起恒言朝事壞於五虎主之者起恒也公入見請
除君側奸數言決矣必正許之有為起恒解者謂必正
曰五虎攻嚴公嚴公反力救五虎此長者奈何以為奸

必正見王乃力言起恒虛公可任請手敕邀與俱還文
安之入朝起恒讓為首輔桂林破從王奔南寧先是孫
可望據雲南遣使乞封王天麟議許之起恒持不可後
胡執恭矯詔封為秦王可望知其偽遣使求真封起恒
又持不可可望大怒至是可望知王播遷遣其將賀九
儀張勝等率勁卒五千迎王至南寧直上起恒舟怒目
攘臂問王封是秦非秦起恒曰君遠迎主上功甚偉朝
廷自有隆恩若專問此事是挾封非迎主上也九儀怒

格殺之投屍於江遂殺給事中劉堯珍吳霖張載述追殺兵部尚書楊鼎和於崑崙關皆以阻封議故時

順治八年二月也起恒既死屍流十餘里泊沙渚間虎負之登崖塋於山麓

朱天麟字游初崑山人崇禎元年進士授饒州推官有惠政考選入都貧不能行賂擬授部曹帝御經筵講官竝為稱屈及臨軒親試乃改翰林編修十七年正月奉命祭淮王抵山東而京師陷及南都破走福州唐王擢

少詹事署國子監事天麟見鄭芝龍跋扈乞假至廣東聞汀州變又走廣西入安平土州

順治四年永明王居武岡以禮部侍郎召天麟疏請王自將倡率諸鎮毋坐失事機辭不至明年王在南寧擢禮部尚書尋拜東閣大學士天麟請親率土兵畧江右不聽乃趨謁王會李成棟反

大清從王至潯州而潯帥陳邦傳請世居廣西如黔國公故事天麟執不允邦傳怒以慶國公印尚方劍擲天

麟舟中要必得仍執不允已而成棟奉王駐肇慶天麟
謂機可乘復勸王亟頒親征詔規取中原王優詔答之
當是時朝臣各樹黨從成棟至者曹昇耿獻忠洪天擢
潘曾緯毛毓祥李綺自誇反正功氣凌朝士從廣西扈
行至者天麟及嚴起恒王化澄晏清吳貞毓吳其雷洪
士彭雷德復尹三聘許兆進張孝起自恃舊臣詆曹耿
等嘗事異姓久之復分吳楚兩黨主吳者天麟孝起貞
毓李用楫堵允錫王化澄萬翔程源郭之奇皆內結馬

吉翔外結陳邦傳主楚者袁彭年丁時魁蒙正發劉湘
客金堡皆外結瞿式耜內結李元允元允者惠國公成
棟子為錦衣指揮使進封南陽伯握大權彭年等倚為
心腹勢張甚彭年嘗論事王前語不遜王責以君臣之
義彭年勃然曰儻向者惠國以五千鐵騎鼓行而西君
臣義安在王變色大惡之彭年等謀攻去吉翔邦傳權
可獨擅也而堡居言路有鋒氣乃疏陳八事劾慶國公
邦傳十可斬文安侯吉翔司禮中官龐天壽大學士起

恒化澄與馮起恒化澄乞去天麟奏留之堡與給事中
時魁等復相繼劾起恒吉翔天壽無已太后召天麟面
諭武岡危難賴吉翔左右令擬諭嚴責堡等天麟為兩
解卒未嘗罪言者而彭年輩怒不止王知羣臣水火甚
令盟於太廟然黨益固不能解明年春邦傳訐堡官臨
請嘗降流賊受其職且請堡為已監軍天麟因擬諭譏
堡堡大憤時魁乃鼓言官十六人詣閣詆天麟至登殿
陞大譁棄官擲印而出王方坐後殿與侍臣論事大驚

兩手交戰恭傾於衣急取還天麟所擬而罷天麟遂辭
位王慰留再三不可陸辭叩頭乞王亦泣曰卿去余益
孤矣初時魁等謂所擬出起恒意欲入署毆之是日起
恒不入而天麟獨自承遂移怒天麟逐之去天麟移居
慶遠化澄貪鄙無物望亦為時魁等所攻碎冠服辭去
王乃召何吾騶王士俊入輔未幾吾騶亦為堡等排去
獨士俊起恒在乃復召天麟天麟不至堡等既連逐三
相益橫每闌入閣中授閣臣以意指王不得已建文華

殿於正殿旁令閣臣侍坐擬旨以避之堡又連劾堵允錫及侍郎萬翔程源郭之奇尚書吳貞毓貞毓等欲排去之畏元允為援不敢發七年春王赴梧州元允留筆慶陳邦傳適遣兵入衛貞毓之奇翔源乃合諸給事御史劾彭年湘客時魁堡正發把時朝政罔上行私罪王謂彭年反正有功免議下堡等獄堡又以語觸忌與時魁竝謫戍湘客正發贖配追賊王乃再召天麟天麟疏言年來百爾構爭盡壞實事昔宋高宗航海猶有退步

今則何地可退當奮然自將文武諸臣盡擐甲胄臣亦
抽峒丁擇土豪募水手經畧嶺北湖南為六軍倡若徒
責粟擬以為主持政本今政本安在乎時

大兵益逼孫可望請王赴雲南初起恒持可望封天麟
及化澄獨謂宜許及可望使至天麟力請從之諸臣以
起恒被殺故皆不可天麟乃奉命經畧左右兩江土司
以為勤王之助兵未集

大兵逼南寧王倉皇出走天麟扶病從之明年四月抵

廣南王已先駐安龍天麟病劇不能入覲卒於西坂村
張孝起吳江人舉於鄉授廉州推官

大兵至逼海濱舉兵謀恢復戰敗被獲妻妾俱投海死
孝起羈軍中會李成棟叛

大清孝起乃脫去永明王以為吏科給事中清真介直
不與流俗伍王至梧州劉湘客丁時魁金堡蒙正發以
失李元允援竝辭職王報許以孝起代時魁掌吏科印
俄與廷臣共排去湘客等遂為其黨所疾高必正湘客

鄉人也尤疾之怒罵於朝王為解乃已久之擢孝起右
僉都御史巡撫高雷廉瓊四府城破走避龍門島島破
被執不食七日死

楊畏知寶雞人崇禎中厯官雲南副使分巡金滄乙酉
秋武定土官吾必奎反連陷祿豐廣通諸縣及楚雄府
畏知督兵復楚雄駐其地必奎伏誅而阿迷土官沙定
洲繼亂據雲南黔國公沐天波走楚雄巡撫吳兆元不
能制許為奏請鎮雲南定洲遂西追天波畏知說天波

走永昌而已以楚雄當定洲定洲至畏知復給之曰若
所急者黔國爾今已西待爾定永昌還朝命當已下予
出城以禮見今順逆未分不能為不義屈也定洲恐失
天波與盟而去分兵陷大理蒙化畏知乘間清野繕堞
徵臨境援兵姚安景東俱響應定洲聞不敢至永昌還
攻楚雄不能下畏知伺賊解輒出擊殺傷多乃引去還
攻石屏寧州嶠峨皆陷之復西攻楚雄迄不能下明年
孫可望等入雲南定洲還救大敗遁歸阿迷可望等遂

據會城初唐王聞畏知抗賊進授右僉都御史巡撫雲南以巡撫吳兆元為總督及可望等至以畏知同鄉甚重之尋與劉文秀西畧畏知拒戰敗投水不死踞而罵可望下馬尉之曰聞公名久吾為討賊來公能共事相與匡扶明室非有他也畏知瞪目視之曰給我爾可望曰不信當折矢誓畏知曰果爾當從我三事一不得仍用偽西年號二不得殺人三不得焚廬舍淫婦女可望皆許諾乃與至楚雄畧定大理諸郡使文秀至永昌迎

天波歸迤西八府免屠戮畏知力也時永明王已稱號於肇慶而詔令不至前御史臨安任傑議尊可望為國主以干支紀年鑄興朝通寶錢畏知憤甚有所忤輒抵掌謾罵可望數欲殺之李定國劉文秀為保護得免可望與劉李同輩一旦自尊兩人不為下聞肇慶有君李錦李成棟等竝加封爵念得朝命加王封庶可相制乃議遣使奉表畏知亦素以尊主為言歲己丑遣畏知及永昌為兵部郎中龔彞赴肇慶進可望表請王封為金

堡等所持畏知乃曰可望欲權出劉李上爾今晉之上公而卑劉李侯爵可也乃議封可望景國公賜名朝宗定國文秀皆列侯遣大理卿趙昱為使加畏知兵部尚書兼兵部侍郎同行時堵允錫曾賜空敕得便宜行事昱乃就與謀矯命改封可望平遼王易敕書以往武康伯胡執恭者慶國公陳邦傳中軍也守泗城州與雲南接欲自結可望言于邦傳先矯命封可望秦王曰藉其力可制李赤心也邦傳乃鑄金章曰秦王之寶填所給

空敕令執恭齋行可望大喜郊迎亡何畏知等至可望
駭不受曰我已封秦王矣畏知曰此偽也執恭亦曰彼
亦偽也所封實景國公敕印故在可望怒辭敕使下畏
知及執恭獄而遣使至梧州問故廷臣始知矯詔事文
安侯馬吉翔請封可望激江王使者言非秦不敢復命
大學士嚴起恒持不可兵部侍郎楊鼎和助之且請却
所獻白金玉帶會勛國公高必正等入朝召使者言本
朝無異姓封王例我破京師逼死先帝滔天大罪蒙恩

宥赦亦止公爵爾張氏竊據一隅罪固滅等封上公足
矣安敢冀王爵自今當與我同心報國洗去賊名毋欺
朝廷孱弱我兩家士馬足相當也又致書可望詞義嚴
正使者唯唯退議遂寢必正者李自成妻弟同陷京師
者也可望不得封益怒其年九月親率兵至貴州十一
月
大兵破廣州桂林王走南寧事急遣編修劉蔭封可望
冀王可望仍不受畏知曰秦冀等爾假何如真可望不

聽定國等勸可望遣畏知終其事可望許之明年二月
先遣部將賀九儀張勝張明志赴南寧索沮秦封者起
恒鼎和及給事中劉堯珍吳霖張載述殺之乃真封可
望秦王而畏知旋至痛哭自劾語多侵可望遂留為東
閣大學士與吳貞毓同輔政可望聞之怒使人負至貴
陽面責數之畏知大憤除頭上冠擊可望遂被殺楚雄
人以畏知守城功為立祠以祀

吳貞毓字元聲宜興人崇禎十六年進士事唐王為吏

部文選主事事敗擁立永明王進郎中王駐全州加太常少卿仍掌選事已擢吏部右侍郎從至肇慶拜戶部尚書廣東西會城先後失王徙潯洲再徙南寧貞毓竝從貞毓與嚴起恒共阻孫可望秦王封可望殺起恒貞毓以奉使獲免及還進東閣大學士代起恒可望自雲南還貴陽議移王自近挾以作威其將掌塘報者曹廷生甚貞毓言不可移黔時

順治八年大兵南征勢日迫王召諸臣議有請走海濱

就李元允者有議入安南避難者有議入海抵閩依鄭
成功者惟馬吉翔龐天壽結可望堅主赴黔貞毓因前
阻封議且入廷生言不敢決元允所請出海王不欲就
可望而以海濱遠再下廷議終不決亡何開國公趙印
選衛國公胡一青殿後軍戰敗奔還請王速行急由水
道走土司抵瀨湍二將報

大兵益近相距止百里上下失色皆散去已次羅江土
司追騎相距止一舍會日晡引去乃稍安次龍英抵廣

南歲已暮可望遣兵以明年二月迎王入安隆所改為

安隆府奉王居之宮室庠陋服御粗惡守護將悖逆無人臣禮王不堪其憂吉翔掌戎政天壽督勇衛營詔事

可望謀禪代惡貞毓不附已令其黨冷孟鉞吳象元方祚亨交章彈擊且語孟鉞等曰秦王宰天下我具啟以內外事盡付戎政勇衛二司大權歸我公等為羽翼貞毓何能為吉翔遂遣門生郭璘說主事胡士瑞擁戴秦王士瑞怒厲聲叱退之他日吉翔遣璘求郎中古其品

畫堯舜禪受圖以獻可望其品拒不從吉翔譖於可望杖殺其品而可望果以朝事盡委吉翔天壽於是士瑞與吉事中徐極員外郎林青陽蔡縝主事張錫連章發其奸謀王大怒兩人求救於太后乃免前御史任傑中書方于宣勸可望設內閣九卿科道官改印文為八疊盡易其舊立太廟定朝議擬改國號曰後明日夕謀篡位王聞憂懼密謂中官張福祿全為國曰聞晉王李定國已定廣西軍聲大振欲密下一敕令統兵入衛若等

能密圖乎二人言徐極林青陽張鐫蔡縝胡士瑞曾疏
劾吉翔天壽宜可與謀王即令告之五人許諾引以告
貞毓貞毓曰主上憂危正我輩報國之秋諸君中誰能
充此使者青陽請行乃令佯乞假歸塋而使員外郎蔣
乾倡撰予定國敕主事朱東旦書之福祿等持入用寶
青陽於歲盡間道馳至定國所定國接敕感泣許以迎
王明年夏青陽久未還王將擇使往促貞毓以翰林孔
目周官對都督鄭允元曰吉翔晨夕在側假他事出之

外庶有濟王乃令吉翔奉使祭先王及王太后陵於梧州南寧而遣周官詣定國吉翔在道微知青陽密敕事遣人至定國營偵之主事劉議新者道遇吉翔意其必預謀也告以兩使齎狀吉翔驚駭啟報可望可望大怒竝疑吉翔預謀遣其將鄭國赴南寧逮之會鑄士瑞及李元開以王親試極續東旦及御史林鍾以久次皆予美官天壽及吉翔弟都督雄飛忌甚與其黨郭璘方謀諂之而鍾續極鑄士瑞亦知事洩倉皇劾吉翔天壽

表裏為奸王見事急即下廷臣議罪天壽懼與雄飛馳
貴陽告可望初青陽還至南寧為守將常榮所留密遣
親信劉吉告之王王喜改青陽給事中諭貞毓再撰敕
鑄屏翰親臣金印令吉還付青陽至廉州周官與青陽
遇階至高州賜定國定國拜受命而是時鄭國已械吉
翔至安龍與諸臣面質貞毓謝不知國怒因挾貞毓直
入王所居文華殿迫脅王索主謀者王懼不敢正言謂
必外人假敕實為之國遂努目出與天壽至朝房械貞

毓竝允元鍾繻乾昌元開極鑄士瑞東亘及太僕少卿
趙賡禹御史周允吉朱議康員外郎任斗墟主事易士
佳繫私室又入宮禽福祿為國而出其黨冷孟鉅蒲纓
宋德亮朱企錕等迫王速具主名王悲憤而退朔日國
等嚴刑拷掠獨貞毓以大臣免衆不勝楚大呼二祖列
宗且大罵時日已暮風雷忽震烈繻厲聲曰今日繻等
直承此獄稍見臣子報國苦衷由是衆皆自承國又問
曰主上知否繻大聲曰未經奏明乃復收繫以欺君悞

國盜竇稱詔為罪報可望可望請王親裁王不勝憤下
廷議吏部侍郎張佐辰及纓德亮孟鉅仝銀蔣御曦等

謂國曰此輩盡當處死儻留一人將為後患於是御曦
執筆佐辰擬旨以錫福祿為國為首罪凌遲餘為從罪
斬王以貞毓大臣言於可望罪絞吉翔以福祿等內侍
謂王后知情將廢之令主事蕭尹厯陳古廢后事后泣
訴於王乃已諸人就刑神色不變各賦詩大罵而死其
家人合瘞於安龍北關之馬場已而青陽逮至亦被殺

獨官走免時

順治十一年三月也居二載定國竟奉前敕護王入雲南乃贈貞毓少師太子太師吏部尚書中極殿大學士賜祭謚文忠廕子錦衣世千戶餘贈恤有差已建廟於馬場勒碑大書十八先生成仁處以旌其忠定國既奉王居滇即捕吉翔及其家人令步將斬統武收繫將殺之吉翔日媚統武定國客詣統武吉翔復媚之因相與譽吉翔於定國而微為辨寃定國召吉翔吉翔入謁即

叩頭言王再造功千古無兩吉翔幸望見顏色死且不
朽他是非何足辨也定國乃大喜吉翔因日諂定國客
令說定國薦已入內閣遂與定國客蟠結盡握中外權
天壽亦復用事後從王入緬甸天壽先死吉翔為緬人
所殺高勣字無功紹興人事永明王厯官光祿少卿馬
吉翔龐天壽構殺吳貞毓等李定國奉王至雲南捕吉
翔將殺之已為其所諛遂免死且薦入閣遂得盡握中
外權而天壽亦用事定國與劉文秀時詣二人家定國

時封晉王文秀蜀王也勳與御史鄔昌期患之合疏言
二人功高望重不當往來權佞之門恐滋奸弊復蹈秦
王故轍疏上二王遂不入朝吉翔激王怒命各杖一百
五十除名定國客金維新走告定國曰勳等誠有罪但
不可有殺諫官名定國即偕文秀入救乃復官及定國
敗孫可望兵自以為無他患武備盡弛勳與郎官金簡
進諫曰今內難雖除外憂方大伺我者頓刃待兩虎之
弊而我酣歌漏舟之中熟寢燕薪之上能旦夕安耶二

王老於兵事胡泄泄如此定國愬之王前頗激王擬杖
二臣以解之朝士多爭不可移時未能決而三路敗書
至定國始逡巡引謝二臣獲免簡字萬藏勳鄉人後王
入緬甸二人扈行竝死之有李如月者東莞人官御史
王駐安龍時孫可望獲叛將陳邦傳父子去其皮傳屍
至安龍如月劾可望不請旨擅殺勳鎮罪同莽操而請
加邦傳惡謚以懲不忠王知可望必怒留其疏召如月
入諭以謚本褒中無惡謚理小臣妄言亂制杖四十除

名意將解可望而可望大怒遣人至王所執如月至朝
門外抑使跪如月向闕叩頭大呼太祖高皇帝極口大
罵其人遂剔其皮斷手足及首實草皮內紉之懸於通
衢又有任國璽者官行人

順治十五年永明王將出奔國璽獨請死守章下廷議
李定國等言行人議是但前途尚寬暫移蹕捲土重來
再圖恢復未晚也乃扈王入緬甸緬俗以中秋日大會
羣蠻令黔國公沐天波偕詣首推髻跣足以臣禮見天

波不得已從之歸泣告衆曰我所以屈辱者懼驚憂主
上耳否則彼將無狀我罪益大國璽與禮部侍郎楊在
抗疏劾之時龐天壽已死李國泰代掌司禮監印吉翔
復與表裏為奸國璽集衆末大臣賢奸事為一書進之
王吉翔深恨之王覽止一日國泰即竊去國璽尋進御
史疏論時事三不可解中言禍急然眉當思出險吉翔
不悅即令國璽獻出險策國璽忽然曰時事至此猶抑
言官使不言耶時緬甸弟弒兄自立欲盡殺文武諸臣

遣人來言曰蠻俗貴詛盟請與天朝諸公飲呪水吉翔
國秦邀諸臣盡往至則以兵圍之令諸臣以次出外出
輒殺之凡殺四十二人國璽及在天波吉翔國秦華亭
侯王維恭綏寧伯蒲纓都督馬雄飛吏部侍郎鄧士廉
等皆預焉惟都督同知鄧凱以傷足不行獲免時
順治十八年七月也自是由榔左右無人至十二月緬
人遂送之出境事具

國史初由榔之走緬甸也昆明諸生薛大觀歎息曰不

能背城戰君臣同死社稷顧欲走蠻邦以苟活不重可
羞耶顧子之翰曰吾不惜七尺軀為天下明大義汝其
勉之之翰曰大人死忠兒當死孝大觀曰汝有母在時
其母適在旁顧之翰妻曰彼父子能死忠孝吾兩人獨
不能死節義耶其侍女方抱幼子問曰主人皆死何以
處我大觀曰爾能死甚善於是五人偕赴城北黑龍潭
死次日諸屍相牽浮水上幼子在侍女懷中兩手堅抱
如故大觀次女已適人避兵山中相去數十里亦同日

赴火死有那嵩者沅江土官也世為知府嵩嗣職循法無過王走緬甸過沅江嵩與子肅迎謁供奉甚謹設宴皆金銀器宴畢悉以獻曰此行上供者少聊以佐缺乏耳後李定國號召諸土司兵嵩即起兵應之已而城破登樓自焚闔家皆死其士民亦多巷戰死

贊曰明自神宗而後寢微寢滅不可復振揆厥所由國是紛呶朝端水火寧坐視社稷之淪胥而不能破除門戶之角立故至桂林播越旦夕不支而吳楚之樹黨相

傾猶仍南都翻案之故態也顛覆之端有自來矣於當
時任事諸臣何責哉

明史卷二百七十九

欽定四庫全書

明史卷二百七十九考證

呂大器傳左良玉駐九江稱疾不進以侯恂故疑大器
圖已臣方煒按良玉傳叙良玉以侯恂故疑大器
圖已在後叙大器遣良玉破賊在傳與傳所載互異
謹識

樊一蘅傳

大清兵奄至射殺獻忠降賊及敗死者二三十萬

臣

方煒按

章皇帝實錄斬獻忠時斬首數萬級並破其營一百三十餘處獲馬羸一萬二千二百餘匹謹識

嚴起恒傳給事中雷德復劾其二十餘罪比之嚴嵩

臣方煒按二十餘罪傳未臚列他書亦無可考謹識

朱天麟傳而堡居言路有鋒氣乃疏陳八事劾慶國公

邦傳十可斬臣方煒按良玉八事劾陳邦傳十可

斬傳未臚列他書亦無可考謹識

吳貞毓傳

任國璽附

國璽尋進御史疏論時事三不可

解

臣

方焯按疏論時事三不可傳未全載他書亦

無可考謹識

附明史卷二百七十九考証後

乾隆四十一年

賜謚諸臣

范文光 詹天顏 吳炳 嚴起恒 張孝起

楊畏知 吳貞毓

以上通謚忠節

侯偉時 王錫衮 高勳 金簡 李如月

任國璽 邢嵩 徐極 林青陽 蔡績

張鐫

朱東旦

鄭允元

胡士端

李元開

林鍾


周允吉

朱議辰

任斗墟

易士佳

以上通謚烈愍



總校官編修臣吳紹深

欽定四庫全書薈要

史部
明史卷二百八十一



詳校官兵部主事臣雷純

欽定四庫全書蒼要卷六千八百七十三 史部

明史卷二百八十

大學士張廷玉等奉 敕修

列傳第一百六十八

何騰蛟

章 曠
傳作霖

瞿式耜

汪 皞等

何騰蛟字雲從貴州黎平衛人天啟元年舉於鄉崇禎
中授南陽知縣地四達賊出沒其間數被挫去已從巡
撫陳必謙破賊安臯山斬首四百餘級又討平土寇益



知名遷兵部主事進員外郎出為懷來兵備僉事調口

北道才諳精敏所在見稱遭母憂巡撫劉永祚薦其賢

乞奪情任事騰蛟不可固辭歸服除起淮徐兵備僉事

討平土寇部內宴然十六年冬拜右僉都御史代王聚

奎巡撫湖廣時湖北地盡失止存武昌屯左良王大軍

軍橫甚騰蛟與良玉交歡得相安明年春遣將惠登相

毛憲文復德安隨州五月福王立詔至良玉駐漢陽其

部下有異議不欲開讀騰蛟曰社稷安危繫此一舉倘

不奉詔吾以死殉之抵良玉所而良玉已聽正紀盧鼎
言開讀如禮正紀者良玉所置官名也八月福王命加
騰蛟兵部右侍郎兼撫湖南代李乾德尋以故官總督
湖廣四川雲南貴州廣西軍務召總督楊鶚還明年三
月南京有北來太子事中外以為真朝臣皆曰偽騰蛟
力言不可殺與當國者大忤無何良玉舉兵反邀騰蛟
偕行不可則盡殺城中人以劫之士民爭匿其署中騰
蛟坐大門縱之入良玉破垣舉火避難者悉焚死騰蛟

急解印付家人令速走將自剄為良玉部將擁去良玉

欲與同舟不從乃置之別舟以副將四人守之舟次漢

陽門乘間躍入江水四人懼誅亦赴水騰蛟漂十餘里

漁舟救之起則漢前將軍關忠義侯廟前也家人懷印

者亦至相視大驚覓漁舟忽不見遠近謂騰蛟忠誠得

神佑益歸心焉騰蛟乃從寧州轉瀏陽抵長沙集諸屬

吏堵允錫傅上瑞嚴起恒章曠周大啟吳晉錫等痛哭

盟誓分士馬舟艦糗糧各任其一令允錫攝湖北巡撫

上瑞攝湖南巡撫曠為總督監軍大啟提督學政起恒
故衡永道即督二郡軍食晉錫以長沙推官攝榔桂道
事即遣曠調副將黃朝宣張先璧劉承允兵朝宣自燕
子窩先璧自淑浦承允自武岡先後至兵勢稍振而是
時良玉已死

順治二年五月

大兵下南都唐王聿鍵自立於福州王居南陽時素知
騰蛟賢委任益至李自成斃於九宮山其將劉體仁郝

搖旂等以衆無主議歸騰蛟率四五萬人驟入湘陰距
長沙百餘里城中人不知其來歸也懼甚朝宣即引兵
還燕子窩上瑞請騰蛟出避騰蛟曰死於左死於賊一
也何避焉長沙知府周二南請往偵之以千人護行賊
謂其迎敵也射殺之從行者盡死城中益懼士女悉竄
騰蛟與曠謀遣部將萬大鵬等二人往撫賊見止二騎
迎入演武場飲之酒二人不交一言與痛飲飲畢賊問
來意答言督師以湘陰褊小不足容大軍請即移長沙

因致騰蛟手書召之曰公等歸朝誓永保富貴搖旂等
大喜與大鵬至長沙騰蛟開誠撫慰宴飲盡歡犒從官
牛酒命先壁以卒三萬馳射旌旗蔽天搖旂等大悅招
其黨袁宗第閻養成王進才牛有勇皆來歸驟增兵十
餘萬聲威大震未幾自成將李錦高必正擁衆數十萬
逼常德騰蛟令允錫撫降之置之荊州錦自成從子後
賜名赤心必正則自成妻高氏弟也高氏語錦曰汝願
為無賴賊抑願為大將邪錦曰何謂也曰為賊無論既

以身許國當愛民受主將節制有死無二吾所願也錦
曰諾騰蛟慮錦跋扈他日過其營請見高氏再拜執禮
恭高氏悅戒其子毋忘何公錦自是無異志自成亂天
下二十年陷帝都覆廟社其衆數十萬悉歸騰蛟而騰
蛟上疏但言元兇已除稍洩神人情宜告謝郊廟卒不
言已功唐王大喜立拜東閣大學士兼兵部尚書封定
興伯仍督師而疑自成死未實騰蛟言自成定死身首
已糜爛不敢居功因固辭封爵不允今規取江西及南

都當是時降卒既衆騰蛟欲以舊軍參之乃題授朝宣
先壁為總兵官與承允赤心郝永忠宗第進才及董英
馬進忠馬士秀曹志建王允成盧鼎竝開鎮湖南北時
所謂十三鎮者也永忠即搖旂英騰蛟中軍志建則故
巡按劉熙祚中軍餘皆良玉舊將也騰蛟銳意東下拜
表出師明年正月與監軍御史李膺品先赴湘陰期大
會岳州先壁逼遛諸營亦觀望獨赤心自湖北至為
大兵所敗而還諸鎮兵遂罷騰蛟威望由此損時諸將

皆驕且貪殘朝宣尤甚劫人而剥其皮永忠效之殺民
無虛日騰蛟不能制故總督楊鷄者尅餉失軍心至是
復黃緣為偏沅總督騰蛟以為言乃召鷄還王數議出
關為鄭氏所阻騰蛟屢請幸贛協力取江西王遣使徵
兵騰蛟發永忠精騎五千往永忠不肯前五月始抵柳
州會

大兵破汀州聿鍵見執死贛州亦失騰蛟聞王死大慟
厲兵保境如平時已聞永明王立乃稍自安王尋以騰

蛟為武英殿大學士加太子太保王進才故守益陽聞
大兵漸逼還長沙四年春進才揚言乏餉大掠并及湘
陰適

大兵至長沙進才走湖北騰蛟不能守單騎走衡州長
沙湘陰竝失盧鼎時守衡州而先壁兵突至大掠鼎不
能抗走永州先壁遂挾騰蛟走祈陽又間道走辰州騰
蛟脫還走永州甫至鼎部將復大掠鼎走道州騰蛟與
侍郎嚴起恒走白牙市

大兵遂下衡永初騰蛟建十三鎮以衛長沙至是皆自為盜賊

大兵入衡州守將黃朝宣降數其罪支解之遠近大快大清以一知府守永州副將周金湯澗城虛夜鼓譟而登知府出走金湯遂入永六月騰蛟在白牙王密遣中使告以劉承允罪令入武岡除之騰蛟乃走謁王王及太后皆召見承允由小校以騰蛟薦至大將已漸倨騰蛟在長沙徵其兵承允大怒言先調朝宣先壁軍皆章

曠親行今乃折筭使我遂馳至黎平執騰蛟子索餉數

萬子走訴騰蛟騰蛟遣曠行承允乃以衆至騰蛟為請

於王得封定蠻伯且與為姻承允益驕至是爵安國公

勛上柱國賜尚方劍益坐大忌騰蛟出已上欲奪其權

請用為戶部尚書專領餉務王不許王召騰蛟圖承允

騰蛟無兵命以雲南援將趙印選胡一青兵隸之及辭

朝賜銀幣命廷臣郊餞承允伏千騎襲騰蛟印選卒力

戰盡殲之騰蛟乃還駐白牙八月

大兵破武岡承允降王走靖州又走柳州時常德寶慶已失永亦再失王將返桂林而城中止焦璉軍騰蛟率印選一青入為助而南安侯郝永忠忽擁衆萬餘至與璉兵欲鬪會宜章伯廬鼎兵亦至騰蛟為調劑桂林以安乃遣璉永忠鼎印選一青分扼興安靈川永寧義寧諸州縣十一月

大兵逼全州騰蛟督五將合禦五年正月王居桂林加騰蛟太師進爵為侯子孫世襲二月

大兵破全州至興安永忠兵大潰奔桂林逼王西縱兵
大掠騰蛟自永福至

大兵知桂林有變直抵北門騰蛟督璉一青等分三門
拒守

大兵乃還全州會金聲桓李成棟叛

大清以兵附

大兵在湖南者姑退騰蛟遂取全州復遣保昌侯曹志
達宜章侯盧鼎新興侯焦璉新寧侯趙印進攻永州圍

城三月大小三十六戰十一月朔入永未幾監軍御史
余鯤起職方主事李甲春取寶慶諸將亦取衡州馬進
忠取常德所失地多復騰蛟議進兵長沙會督師堵允
錫惡進忠招忠貞營李赤心軍自夔州至令進忠讓常
德與之進忠大怒盡驅居民出城焚廬舍走武岡寶慶
守將王進才亦棄城走他守將皆潰赤心等所至皆空
城旋棄走東趨長沙騰蛟時駐衡州大駭六年正月檄
進忠由益陽出長沙期諸將畢會而親詣忠貞營邀赤

心入衡部下卒六千人懼忠貞營掩襲不護行止攜吏卒三千人往將至聞其軍已東即尾之至湘潭湘潭空城也赤心不守而去騰蛟乃入居之

大兵知騰蛟入空城遣將徐勇引軍入勇騰蛟舊部將也率其卒羅拜勸騰蛟降騰蛟大叱勇遂擁之去絕食七日乃殺之永明王聞之哀悼賜祭者九贈中湘王謚文烈官其子文瑞僉都御史章曠字于野松江華亭人崇禎十年進士授沔陽知州十六年三月賊將郝搖旗

陷其城同知馬颺死之曠走免謁總督袁繼咸於九江署為監紀從諸將方國安毛憲文馬進忠王允成等復漢陽武昌巡按御史黃澍令署漢陽推官兼攝府事承德巡撫王揚基令署分巡道事明年四月憲文偕惠登相復德安揚基檄曠往守城空無人衛官十數人齎印送賊將白旺曠收斬之日夕為警備居三月代者李藻至巡撫何騰蛟檄曠署荆西道事曠去藻失將士心城復陷給事中熊文霖御史游有倫劾曠沔陽失城罪候

訊黃州用騰蛟薦令戴罪立功福王立南京左良玉將
犯闕騰蛟至長沙以曠為監軍副將黃朝宣者故巡撫
宋一鶴部將駐燕子窩騰蛟令曠召之來副將張先壁
屯精騎三千於溆浦復屬曠召之留為精軍而以朝宣
戍茶陵又令曠調劉承允兵於武岡會李自成死其下
劉體仁郝搖旂素宗弟蘭養成王進才牛有勇六大部
各擁數萬兵至騰蛟與曠計畫撫其衆軍容大壯左良
玉死其將馬進忠王允成無所歸突至岳州偏沅巡撫

傅上瑞大懼曠曰此無主之兵可撫也入其營與進忠握手指白水為誓進忠等皆從之進忠即賊中渠魁混十萬也時南京已破

大兵逼湖南諸將皆畏怯曠獨悉力禦唐王擢為右僉都御史提督軍務恢勦湖北曠有智畧行軍不避鋒鏑身托湘陰平江之衝湖南恃以無恐常戰岳州以後軍不繼而還已又大戰大荆驛永明王加兵部右侍郎長沙守將王進才與狼兵將覃遇春閩大掠而去騰蛟奔

衡州曠亦走竇慶長沙遂失騰蛟駐祈陽曠來會騰蛟
以兵事屬曠而謁王武岡曠移駐永州見諸大將擁兵
聞警輒走抑鬱而卒傅作霖武陵人由鄉舉仕唐王大
學士蘇觀生奏為職方主事監紀其軍觀生歿倚何騰
蛟長沙改監軍御史永明王在全州起拜兵部左侍郎
掌部事尋進尚書從至武岡時劉承允擅政作霖與相
善故驟遷及

大兵逼武岡承允議迎降作霖勃然責之承允遣使納

款

大兵入城作霖冠帶坐堂上承允力勸之降不從遂見
殺妾鄭有殊色見執驅之過橋躍入水中死有蕭曠者
武昌諸生為承允坐營參將騰蛟題為總兵官管黎平
參將事及承允降允令降將陳友龍招曠曠不從已而
破死之傅上瑞初為武昌推官賊圍城遁走久之騰蛟
薦為長沙僉事又令攝徧沅巡撫事勸騰蛟設十三鎮
卒為湖南大害唐王時用騰蛟薦擢右僉都御史實授

偏沅巡撫性反覆棄騰蛟如遺武岡破

大兵逼沅州上瑞出降踰年劉承允並誅死

瞿式耜字起田常熟人禮部侍郎景淳孫湖廣參議汝
說子也舉萬曆四十四年進士授吉安永豐知縣有惠
政天啟元年調江陵永豐民乞留命再任以憂歸崇禎
元年擢戶科給事中疏言李國樞宜留內閣王永光宜
典銓曹于汴宜秉憲鄭三俊畢懋良宜總版曹李邦華
宜主戎政帝多采其言俄陳朝政不平為王之案請恤

孫慎行訟寃逮楊鎬王化貞之誅白楊漣左光斗結毒之謗追論故相魏廣微顧秉謙馮銓黃立極之罪因言奪情建祠之朱童蒙不可寃積愆久廢之湯賓尹不可用帝亦納之又極論朱宗道楊景辰附逆不可居政府二人旋罷去御史袁弘勛劾大學士劉鴻訓逆黨徐大化實主之川貴總督張鶴鳴先已被廢其復用由魏忠賢式耜並疏論已頌楊漣魏大中周順昌為清中之清忠中之忠三人遂賜謚未幾陳時務七事言起廢不可

不覈陞遷不可不漸會推不可不慎謚典宜嚴刑章宜
飭論人宜審附璫者宜區分又極論館選奔競之弊請
臨軒親試未言古有左右史記天子言動今召對時勤
宜令史官入侍紀錄昭示朝野事多議行時將定逆案
請盡發紅本定其情罪輕重又言宣府巡撫徐良彥不
附逆庵為崔呈秀誣劾遣戍亟當登用良彥遂獲起武
耜矯矯立名所建白多當帝意然搏擊權豪大臣多畏
其口十月詔會推閣臣禮部侍郎錢謙益以同官周延

儒方言事蒙眷慮並推則已絀謀沮之式耜謙益門人
也言於當事者擯廷儒弗推而列謙益第二溫體仁遂
發難延儒助之謙益奪官閒住式耜坐貶謫式耜嘗頌
貴寧參政胡平表殺賊功請優擢其後平表為貴州布
政使坐不謹罷式耜再貶二秩遂廢於家久之常熟奸
民張漢儒希體仁指訐謙益式耜貪肆不法體仁主之
下法司逮治巡撫張國維巡按路振飛交章白其寃不
聽比兩人就獄則體仁已去位獄稍解謙益坐削籍式

耜贖徒言官疏薦不納十七年福王立於南京八月起
式耜應天府丞已擢右僉都御史代方震孺巡撫廣西
明年夏甫抵梧州聞南京破靖江王亨嘉謀僭號召式
耜拒不往而檄思恩參將陳邦傳助防止狼兵勿應亨
嘉調亨嘉至梧劾式耜幽之桂林遣人取其軟印初式
耜議立桂端王子安仁王及唐王監國式耜以為倫序
不當立不奉表勸進至是為亨嘉所幽乃遣使賀王因
乞援王喜而亨嘉為丁魁楚所攻勢窘乃釋式耜式耜

與中軍官焦璉召邦傳共執亨嘉亂遂定唐王擢式耜
兵部右侍郎協理戎政以晏日曙來代式耜不入朝退
居廣東

順治三年九月

大兵破汀州式耜與魁楚等議立永明王由榔乃迎王
梧州以十月十日監國肇慶進式耜吏部右侍郎東閣
大學士兼掌吏部事未幾贛州敗報至司禮王坤迫王
赴梧州式耜力爭不得十一月朔蘇觀生立唐王聿錡

於廣州式耜乃與魁楚等定議迎王還肇慶遣總督林
佳鼎禦觀生兵敗歿式耜視師峽口十二月望

大兵破廣州王坤趣王西走式耜趨赴王王已越梧而
西四年正月

大兵破肇慶逼梧州巡撫曹曷迎降王欲走依何騰蛟
於湖廣丁魁楚呂大器王化澄皆棄王去止式耜及吳
炳吳貞毓等從乃由平樂抵桂林二月

大兵襲平樂分兵趨桂林王將走全州式耜極陳桂林

形勢請留不許自請留守許之進文淵閣大學士兼兵部尚書賜劍便宜從事平樂潯州相繼破桂林危甚總督侍郎朱盛濃走靈川巡按御史辜廷泰走融縣布政使朱盛澗副使楊垂雲桂林知府王惠卿以下皆遁惟式耜與通判鄭國藩縣丞李世榮及都司林應昌李當瑞沈煌在焉王令兵部右侍郎丁元昇代盛濃御史魯可藻代廷泰未赴而

大兵已於三月薄桂林以騎數十突入文昌門登城樓

瞰式耜公署式耜急令援將李璉拒戰初永明王為賊
執璉率衆攀城上破械出之王病不能行璉負王以行
王以此德璉用破靖江王功命為參將及是戰守三月
璉功最多元暉可藻亦盡力式耜身立矢石中與士卒
同甘苦積雨城壞吏士無人色式耜督城守自如故人
無叛志援兵索餉而譁式耜括庫不足妻邵捐簪珥佐
之既而璉兵主客不和謀而去城幾破者數矣會陳邦
彥等攻廣州

大兵引而東桂林獲全璉亦復陽朔及平樂陳邦傳亦
由潯復梧州王聞捷封式耜臨桂伯璉新興伯元昇等
進秩有差式耜初請王返全州不聽已請還桂林王已
許之會武岡破王由靖州走柳州式耜復請還桂林十
一月

大兵自湖南逼全州式耜偕騰蛟拒却已梧州復破王
方在象州欲走南寧以大臣力爭乃以十二月還桂林
五年二月南安侯郝永忠駐桂林惡城外團練兵盡破

水東十八村殺戮無筭與式耜構難式耜力調劑永忠
乃駐興安

大兵前驅至靈川永忠戰敗奔入桂林請王即夕西走
式耜力爭不聽左右皆請速駕式耜又爭王曰卿不過
欲予死社稷爾式耜為泣下沾衣王甫行永忠即大掠
捶殺太常卿黃太元式耜家亦被掠家人矯騰蛟令箭
乃出城日中趙印選諸營自靈川至亦大掠城內外如
洗永忠走柳州印選等走永寧明日式耜息城中餘燼

安撫遠近焦璉及諸鎮周金湯兆佐胡一青等各率所部至騰蛟軍亦至三月

大兵知桂林有變來襲抵北門騰蛟督諸將拒戰城獲全時王駐南寧式耜遣使慰三宮起居王始知式耜無恙為泣下閏三月廣東李成棟江西金聲桓皆叛

大清據地歸式耜請王還桂林王從成棟請將赴廣州式耜慮成棟挾王自專如劉承允事力爭之乃駐肇慶十一月永州賓慶衡州並復式耜以機會可乘請王還

桂林圖出楚之計不納慶國公陳邦傳守潯州自稱世

守廣西欲如黔國公例式耜特疏劾之會中外多爭者
邦傳乃止廣西巡撫魯可藻自署銜巡撫兩廣式耜亦
疏駁之式耜身在外政有闕必疏諫嘗曰臣與主上患
難相隨休戚與共不同他臣一切大政自得與聞王為
褒納而是時成棟子元允專朝政知敬式耜袁彭年丁
時魁金堡等遂爭相倚附六年正月時魁等逐朱天麟
不欲何吾騶為首輔召式耜入直以文淵印畀之式耜

終不入也未幾騰蛟聲桓成棟相繼敗歿國勢大危朝
士方植黨相角式耜不能禁七年正月南雄破王懼走
梧州諸大臣訐時魁等下獄式耜七疏論救胡執恭之
擅封孫可望也式耜疏請斬之皆不納九月全州破開
國公趙印選居桂林衛國公胡一青守榕江與寧遠伯
王永祚皆懼不出兵

大兵遂入嚴關十月一青永祚入桂林分餉榕江無戍
兵

大兵愈深入十一月日式耜檄印選出不肯行再邀
之則盡室逃一青及武陵侯楊國棟綏寧伯蒲纓寧武
伯馬養麟亦逃去永祚迎降城中無一兵日式耜端坐府
中家人亦散部將戚良勛請式耜上馬速走式耜堅不
聽叱退之俄總督張同敞至誓偕死乃相對飲酒一老
兵侍召中軍徐高付以敕印屬馳送王是夕兩人秉燭
危坐黎明數騎至式耜曰吾兩人待死久矣遂與偕行
至則踞坐於地諭之降不聽幽於民舍兩人日賦詩倡

和得百餘首至閏十一月十有七日將就刑天大雷電
空中震擊者三遠近稱異遂與同敵俱死同敵大學士
居正曾孫事見居正傳時桂林殉難者光祿少卿汪皞
投水死其破平樂也守將鎮西將軍朱旻如自到有周
震者官中書舍人居全州慷慨尚氣節武岡失全州危
震邀文武將吏盟於神誓死拒守條城守事宜上之留
守翟式耜式耜即題為御史監全州軍無何郝永忠盧
鼎自全州撤兵還桂林守全諸將議舉城降震力爭不

可衆怒殺之全州遂失

贊曰何騰蛟瞿式耜崎嶇危難之中介然以艱貞自守
雖其設施經畫未能一覩厥效要亦時勢使然其於鞠
躬盡瘁之恭無少虧損固未可以是為訾議也夫節義
必窮而後見如二人之竭力致死靡有二心所謂百折
不回者也明代二百七十餘年養士之報其在斯乎其
在斯乎

明史卷二百八十

欽定四庫全書

明史卷二百八十考證

瞿式耜傳以十月十日監國肇慶

臣嚴福按明史永

明王傳作十月十四日與此互異謹識

附明史卷二百八十考證後

乾隆四十一年

賜諡諸臣

何騰蛟 專諡忠誠

瞿式耜 專諡忠宣

傅作霖 周 震

以上通諡忠節

蕭 曠 朱旻如

以上通諡烈愍

汪 皞 通諡節愍